

universaliter est verum. Nam notiones communes etiam sunt in intellectu, postquam homo adoleverit, quæ tamen & oblivione sepeliri non posse videntur. Nec assumptio omni caret exceptione: siquidem prudentia cum doctrinâ & experienciâ acquiratur, quæ ex memoriâ nascuntur & oblivioni sunt obnoxia, utique & ipsa aliquô modò oblivioni tradi poterit.

§. 10.

(II.) Deinde Kekermannus negat, Prudentiam tantum esse virtutem intellectualem, sed ex parte, intellectualem, ex parte moralem esse contendit, quod videre est ex disp. illius XXI. que de Prudentiâ inscribitur, in quâ sic procedit: Prudentia potest dici intellectualis ratione causa efficientis naturalis, quia, magis quodammodò pendet ab intellectu & iudicio; reliqua virtutes magis à dispositione voluntatis & affectuum. (2.) ratione subjecti; intellectus nimirum practici, quò proximè movetur voluntas ad agendum secundum hanc virtutem. Moralem autem virtutem esse dicimus, tum ratione objecti, quia versatur circa ea, quæ agibilia, que magis sunt objecta voluntatis, quàm intellectus. Tum ratione finis quia perficit voluntatem & appetitum: & quia etiam ad bonum ordinatur, ut virum bonum efficiat. Hæc ille. Unde liquidò cognoscimus, quòd ex Prudentiâ virtutem aliquam mixtam efficiat. Verum Kekermannus errat, si Prudentiam ideò Moralem dicit, quod cum virtute morali idem objectum habet. Nulla enim est consequentia. Prudentia idem cum virtute morali objectum habet. E. est virtus moralis. Idem enim cum eadem objectum habere potest sed alio atq; alio respectu: Sicut diversa disciplina v. g. Theologia, Medicina, Physica, Ethica, Politica circa idem objectum, nempe Hominem versari possunt, sed sub diversò considerandi modò, qui objectum formale constituit. Aliter enim Theologia, aliter Medicina, aliter Physica, aliter Ethica, aliter Politica hominem considerat. Quis ergò dixerit: Theologia & Medicina idem habent objectum. E. Theologia est Medicina, & vice versa &c. Eadem est Prudentia & virtutis moralis conditio. Licet enim res agenda utriusque objectum sit: aliter tamen prudentia, aliter virtus moralis circa illam versatur, nempe prudentia rem agendam, ut est verum,